

## **Inatsisissatut siunnersuummut oqaaseqaatit**

### **Oqaaseqaatit nalinginnaasut**

#### **1. Inatsisissatut siunnersuutip tunngavia**

Akilerartarnermut Aqutsisoqarfiup angalasut nioqqutissanik Kalaallit Nunaannut eqqussuinerat, Nioqqutissanik eqqussuineq annissuinerlu pillugit Inatsisartut inatsisaanni maleruagassat atuuttut naapertorlugit nakkutigisinnaavaa. Akilerartarnermut Aqutsisoqarfiup misissuini, politiit aanngajaarniutinik nioqqutissanillu inerteqqutaasunik allanik misissuineranni suleqatigalugit amerlasuutigut ingerlattarpaa. Misissuineq inuit angallatillu nunatta killeqarfianut tikinnerini ataasiakkaanik misissuinikkut imaluunniit ilaannikkooriarluni tamanik misissuinkut pisarpoq.

Angallatit naalagaat § 29 atuuttoq naapertorlugu pisussaapput paasissutissanik Akilerartarnermut Aqutsisoqarfiup nakkutilliineranut pisariaqartunik tunniussissallutik uppersaassallutillu. Pineqartut tassaapput angallat, inuttat, ilaasut aamma usit il.il. pillugit paasissutissat. Tassunga aamma ilaavoq Akilerartarnermut Aqutsisoqarfiup piumasarisinnaammagu ilaasunik angallasseqatigiiffiit, umiarsuit timmisartullu tikinnerannut aallarnerannullu atatillugu paasissutissaatit, matumani aamma inuttat ilaasullu kikkuneru, nassatat il.il. pillugit paasissutissat Akilerartarnermut Aqutsisoqarfimmumut nalunaarutigissagaat.

Pissutsit maanna imaapput Akilerartarnermut Aqutsisoqarfik ilaasut Kalaallit Nunaanni timmisartoqarfimmut, matumani aamma Kangerlussuarmi, Nuummi, Narsarsuarmi Ilulissanilu timmisartoqarfimmit tikittussat allattorsimaffiinik, aallarnissaat sioqqullugu nassinneqartarluni. Allattorsimaffiit mailikkut pineqartarput, aalajangersimasumillu pissutissaqartillugu timmisartup tikinnerani misissuinissaq piareersarneqartarpoq. Amerlasuutigulli misilittagaavoq allattorsimaffiit allannguutinik kingullerpaanik imaqartannginnerat, soorlu aamma allattorsimaffiit paasissutissanik misissuinerup ingerlannissaanut pisariaqartunik tamanik tamatigut imaqartanngitsut.

§ 29-mi allannguutissatut siunnersuutigineqartutigut Akilerartarnermut Aqutsisoqarfik, ilaasut il.il. pillugit paasissutissanik, ilaasunik angallasseqatigiiffiit billetsinut/inniminniineranut nalunaarsuiffiini mittarfimmi toqqaannartumik qarasaasiakkut takunnissinnaanissamik piumasaqarnissamut periarfissaqalissaaq. Tamanna misissuisarnermik pitsanngorsaaqataanissamik siunertaqarpoq.

Timmisartup mittarfimmi tikiffimmi uninngatinneqarsinnaanera tassunga ilutigitillugu periarfissuunerpoq, tamanna paasissutissat tamarmik piffissaagallartillugu, timmisartup Kalaallit

Nunaannut tikiinginnerani Akileraartarnermut Aqutsisoqarfimmut tunniunneqarsimanissaanik isumannaarisarnissamik kaammattuutaassaaq.

Akileraartarnermut Aqutsisoqarfik Nioqqutissanik eqqussuineq annissuinerlu pillugit Inatsisartut inatsisaanni § 30 naapertorlugu pisinnaatitaavoq angalasunik misissuinissamut. Misissuineq sapinngisamik qajassuartumik pissaaq, aamma misissuineq atisanut qallernut killeqanngitsoq taamaallaat pisinnaavoq naapertuuttumik pissuteqarluni ilimagineqarpat pineqartoq inatsisinik unioqqutitsilluni nioqqutissanik il.il. timimi iluanut toqqortuisimasooq.

Teknologi nutaaliaasoq atorlugu maanna inuit timaat attuugallugit misissunngikkaluarlugit tarrarsuinermi qinngornerit atorlugit scannerneqarsinnaapput. Ilaasunik scannerineq qinngornerit iluaqutigalugit pisarpoq, ilaasullu nioqqutissanik il.il. timimi iluanut toqqortuilluni eqqussiniarnera pissuteqavissumik ilimagineqarpat aatsaat atorneqassaaq. Angalasunik ataasiakkaanik scannerinissaq pasinaateqarnerannik naliliinikkut pisassaaq, ilaasullu tamarluinnaasa misissorneqarnaviangillat.

Angalasup scannerneqarnissani nammineq akuersissutigissavaa, angalasullu scannerneqarnissani sukkulluunniit itigartitsissutigisinnavaa. Angalasup scannerneqarnissani kissaatiginnigipagu pineqartoq pisarnertut timaatigut misissorneqassaaq.

Inuup inatsisinik unioqqutitsilluni nioqqutissanik il.il. timimi iluanut toqqortuisimanera naapertuuttumik pissuteqarluni ilimagineqartillugu inunnik scannerisinnaaneq aalajangersakkap maannakkut atuuttup ajornartinngilaa. Taamaaliorsinnaanerulli inatsisitigut illersugaanissaq pissutigalugu inatsimmik erseqqissumik allassimanissaa kissaatigineqarpoq.

Kiisalu aamma aningaasanik tigoriaannarnik Kalaallit Nunaannut tassangaanniilluunniit allakkatigut imaluunniit inunnut allanut nassartinnerisigut nassiuunneqartunik nakkutilliinissaq siunertaralugu inatsimmik aaqqiinissaq pisariaqalersimavoq.

Siunnersuutip kingunerissavaa aningaasat amerlasuut inunnut allanut nassartillugit nassiuunneqartut pillugit nalunaaruteqartussaanerup atuutilernissaa aammalu taakku arsaarinnissutigineqarsinnaanissaat. Tamanna aningaasat tigoriaannaat siunertanut inerteqqutaasunut atorneqartussat nuussorneqartarnerisa akiorniarneqarnissaanik siunertaqarpoq, tassa ilaatigut aningaasat tigoriaannaat killissarititaasutut aalajangersagaasumit 15.000 euronit amerlanerusut, pinerluttulerinermik inatsimmik unioqqutitsilluni pissarsiaasimanissaat taamatulluunniit atorneqarnissaat ilimanaateqarpat arsaarinnissutigineqarsinnaalernerisigut.

## **2. Siunnersuutip imarisai pingaernerit**

Siunnersuutaavoq Akileraartarnermut Aqutsisoqarfik, ilaasut il.il. pillugit paasissutissanik, ilaasunik angallasseqatigiiffiit billetsinut/inniminniinernut nalunaarsuiffiini mittarfimmi toq-

qaannartumik qarasaasiakkut takunnissinnaanissamik piunasaqarnissamut periarfissaqalissa-  
soq. Tamanna misissuisarnermik pitsanngorsaaqataaanissamik siunertaqarpoq.

Timmisartup uninngatinneqarsinnaanera tassunga ilutigitillugu periarfissiunneqarpoq, taman-  
na paasissutissat tamarmik piffissaagallartillugu, timmisartup Kalaallit Nunaannut tikiing-  
nerani Akileraartarnermut Aqutsisoqarfimmut tunniunneqarsimanissaannik isumannaarisar-  
nissamik kaammattuutaassaaq. Aalajangersagaq ilanngaaserinermit tunngatillugu nunat tamat  
inatsisaannut, matumani aamma danskit ilanngaaserinermit maleruagassaannut naapertuup-  
poq.

Tamatuma saniatigut, inunnik scannerinermit teknologiimik nutaanerpaamik, angalasut ti-  
maasigut attuugallugit misissornagit tarrarsuisinnaasumik atuinissap inatsisitigut erseqqissu-  
mik allassimalernissaa pisariaqalersimavoq.

Taamaattumik siunnersuutaavoq inunnik misissuinermit scannerummik, inuit timaasigut attuu-  
gallugit misissuinermit taarsiullugu, angalasullu akuersineratigut atuinissap pisinnaalernissaa  
inatsimmi erseqqissarneqassasoq. Inuit attuugallugit misissuisarnermit taarsiullugu scanneri-  
salernissamik siunnersuutikkut siunertarineqarpoq, atortorissaarutinik nutaaliaanerusunik,  
inuit attuugallugit misissuisarnermit piffissartornartaqisumut taarsiullugu atuisinnaanissamik  
erseqqissaanissaq.

Kiisalu aamma aningaasanik tigorianaannik Kalaallit Nunaannut tassanngaanniilluunniit al-  
lakkatigut imaluunniit inunnut allanut nassartinnerisigut nassiunneqartunik nakkutilliinissaq  
siunertaralugu inatsimmik aaqqiinissaq pisariaqalersimavoq. aammalu taakku arsaarinnissuti-  
gineqarsinnaanissaat. Taamaammat aningaasat amerlasuut inunnut allanut nassartillugit nassi-  
unneqartut pillugit nalunaaruteqartussaanerup atuutilernissaa aammalu taakku arsaarinnissuti-  
gineqarsinnaanissaat siunnersuutigineqarpoq.

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertai atuuttut</i>	<i>Inatsisissatut siunnersuut</i>
	<b>§ 1</b> Nioqqutissanik eqqussuineq annissuinerlu pil- lugit Inatsisartut inatsisaanni nr. 18, 30. okto- ber 1992-imeersumi, ilaatigut Inatsisartut inat- sisaatigut 12, 21. maj 2010-meersukkut ki- ngullermillu Inatsisartut inatsisaatigut nr. 5, 15. april 2011-meersukkut allanngortinneqar- tumi makku allannguutigitinneqarput:

<p><i>”Imm. 3. Akileraartarnermi Pisortaqarfik pisinnaatitaavoq nakkutilliinerup isumaginnissaanut pisariaqartutut annertutigisumik angallatini sumiluunniit misissuisarnissamut.”</i></p>	<p><b>1. § 29-mi imm. 3-tut nutaatut ilanngunneqarpoq:</b></p> <p><i>” Imm. 3. Akileraartarnermut Aqutsisoqarfiup ilaasunik angallasseqatigiiffiit, inuit akitsuuteqarfiusumukarlutik tassannganneerlutilluunniit angalasut pillugit paasissutissanik, matumani aamma ilaasunik angallasseqatigiiffiit elektroniskiusumik paasissutissaataannik takunnissinnaanissamik piunaffigisinnaavai. Paasissutissat Akileraartarnermut Aqutsisoqarfiup ilaasunik angallasseqatigiiffiit paasissutissaataannik toqqaanartumik takunnissinnaaneratigut pissarsiarineqartut Akileraartarnermut Aqutsisoqarfiup paasissutissaataasiviinut elektroniskiusumik nuunneqarsinnaangillat toqqaannartumilluunniit toqqorneqarsinnaanatik.”</i></p> <p>Imm. 3-5 matuma kingorna tassaalerput imm. 4-6.</p>
	<p><b>2. § 29-mi imm. 7-itut ilanngunneqarpoq:</b></p> <p><i>” Imm. 7. Inuit misissuineq naammassineqartinnagu angallammut isernissaat tassannganniillu aninissaat kiisalu nioqqutissanik eqqusinissaq annissinissarlunniit Akileraartarnermut Aqutsisoqarfiup itigartitsissutigisinnavaa. Aamma angallatip misissuineq naammassineqartinnagu misissuiffiusumik qimatsinissaa Akileraartarnermut Aqutsisoqarfiup ajornartissinnaavaa.”</i></p>
	<p><b>3. § 30-mi imm. 5-itut nutaatut ilanngunneqarpoq:</b></p> <p><i>”Imm. 5. Inatsisit naapertorlugit inuttut isigineqarsinnaasut imaluunniit inuit aningaasanik tigorianaannarnik 15.000 euro-t nalinginit amerlanerusunik nassiussisut nassitittulluunniit, aningaasat tigorianaanaat tamaasa Akileraaruseriffimmut nalunaarutigissavaat kingusinnerpaamik nassiussat</i></p>

	<p>akitsuuseqarfiusumut tikinneranni tassanngaanniiluunniit nassiunneranni.”</p> <p>Imm. 5 matuma kingorna tassaalerpoq imm. 6.</p>
	<p><b>4. § 30-mi imm. 7-itut ilanngunneqarpoq:</b></p> <p>” Imm. 7. Misissuineq imm. 6-imi taaneqartoq inuk pineqartoq akuersisillugu scannerinikkut pisinnaavoq.”</p>
<p>”Imm. 5. Akiliutit atoriaannaat 15.000 euro sinnerlugu nalillit, § 30, imm. 4 naapertorlugu akileraaruseriffimmiut missuinerannut atatillugu nassaarineqartut taakkunangga arsaarinnissutigineqarsinnaapput. Arsaarinninneq pisinnaavoq, akiliutit atoriaannaat pinerluttulerinermi inatsit unioqqutillugu pissarsiarineqarsimasutut imalt. taamatut atorineqarnissaat aarleqqutigineqarpat. Arsaarinnittoqassatillugu, eqqartuussisarneq pillugu inatsisip kapitalia 37 naapertorlugu arsaarinninneq ingerlanneqartassaaq.”</p>	<p><b>5. § 46, imm. 5-imi ”§ 30, imm. 4”-p kingoranut ilanngunneqarpoq: ”aamma § 30, imm. 5”.</b></p> <p>”Imm. 5. Akiliutit atoriaannaat 15.000 euro sinnerlugu nalillit, § 30, imm. 4 aamma § 30, imm 5 naapertorlugu akileraaruseriffimmiut missuinerannut atatillugu nassaarineqartut taakkunangga arsaarinnissutigineqarsinnaapput. Arsaarinninneq pisinnaavoq, akiliutit atoriaannaat pinerluttulerinermi inatsit unioqqutillugu pissarsiarineqarsimasutut imalt. taamatut atorineqarnissaat aarleqqutigineqarpat. Arsaarinnittoqassatillugu, eqqartuussisarneq pillugu inatsisip kapitalia 37 naapertorlugu arsaarinninneq ingerlanneqartassaaq.”</p>
<p>”§ 45. § 1-imi, § 29, imm. 1, 2, aamma 4-mi, § 30, imm. 1-3-mi aamma § 32, imm. 2-mi aalajangersakkanik malinnikkumannngitsoq akiliisinneqarsinnaavoq.</p> <p>Imm. 2. Akileraaruseriffiup § 29, imm. 5 naapertorlugu peqqusineranik sumiginnaasoq akiliisinneqarsinnaavoq.”</p>	<p><b>6. § 45 ima oqaasertaqarpoq:</b></p> <p>”<b>§ 45.</b> § 1-imi, § 29, imm. 1, 2, 3 aamma 5-imi, § 30, imm. 1-3-mi aamma § 32, imm. 2-mi aalajangersakkanik malinnikkumannngitsoq akiliisinneqarsinnaavoq.</p> <p>Imm. 2. Akileraaruseriffiup § 29, imm. 6 aamma 7 naapertorlugit peqqusineranik sumiginnaasoq akiliisinneqarsinnaavoq.”</p>
	<p><b>7. § 46-mi imm. 7-itut ilanngunneqarpoq:</b></p> <p>”Imm. 7. Inatsisartut inatsisaat maleruaqqusat, Inatsisartut inatsisaat naaper-</p>

	<p>torlugu atuutilersinneqarsimasut malillugit akiliisitsisinnaanermik periarfissiippat inatsisit naapertorlugit inuttut isigineqarsinnaasoq Kalaallit Nunaanni Pinerluttulerinermik inatsimmi maleruagassat naapertorlugit akiliisitsissummik akileqquneqarsinnaavoq.”</p>
	<p style="text-align: center;"><b>§ 2</b></p> <p><i>Imm. 1. Inatsisartut inatsisaat 1. juni 2015-imi atuutilissaaq.</i></p>

### **3. Pisortanut aningaasatigut allaffissornikkullu sunniutissai**

Siunnersuutip scannerimik pisinermut ataasiartumik aningaasartuutaanissaa kiisalu atorneranut aserfallatsaaliorneqarneranullu aningaasartuuteqarnissamik kinguneqarnissaa ilimagineqarpoq. Scannerimik pisinermut ataasiartumik aningaasartuutissat 800.000 kr.-it missaanniisangatinneqarput.

Pisinissaq piffissaq ungasinnerusoq eqqarsaatigalugu sulisut nakkutilliinermi suliassanik allanik suliaqarsinnaalernissaannik kinguneqassangatinneqarpoq.

Siunnersuut pisortanut aningaasatigut allaffissornikkulluunniit allanik sunniuteqassangatinneqanngilaq.

Aammattaaq siunnersuut akitsuutinik akiliinngitsoorniarnermik nakkutilliinernut pitsannguutaassangatinneqarpoq.

### **4. Inuussutissarsiutinik ingerlataqartunut aningaasatigut allaffissornikkullu sunniutissai**

Siunnersuut inuussutissarsiutinik ingerlataqartunut aningaasatigut immikkut ittumik sunniuteqassangatinneqarpoq, tassa qarasaasiakkut takunnissinnaalernissamik pilersitsinermut atatillugu.

Siunnersuut inuussutissarsiutinik ingerlataqartunut allaffissornikkut sunniuteqassangatinneqanngilaq.

### **5. Avatangiisinut, pinngortitamut inuillu peqqissusiannut sunniutissai**

Bodyscanneri qinngornerit iluaqutigalugit tarrarsuisarpoq. Qinngornerit suulluunniit uloria-naateqarput sapinngisamillu atornaveersaartariaqarlutik. Bodyscannerili qinngornernik sakkortunngitsunik atuisuuvoq, tassa tarrarsuineri ataatsimi qinngornerit 5,12 mSv-usarlutik. Tassa imaappoq qinngornerit atorineqartut taarsuineri atortunut allanut, soorlu CT-scannerinut, tarrarsuineri ataatsimi qinngornernik 1600 aamma 3200 mSv-nik atuisartunut sanilliullutik sakkukitsuararsuupput.

Avatangiisinut pinngortitamullu sunniuteqarnaviangilaq.

## **6. Innuttaasunut sunniutissai**

Inummik scannerineq ilaasut inuttut inuunerannut namminerit nikanarsaanertut misigineqarsinnaavoq. Inuilli ataasiakkaat timaasa innimigineqarnissaat eqqarsaatigissagaanni scannerineq, inuit timaannik attuugannilluni misissuinerit nalinginnaasumut sanilliulluni soqutaanginneruvoq, tassami angalasut nakkutilliisunit attuuganeqarnaviaratillu atisaajaqquneqarnaviangillat. Taassuma ilutigisaanik aamma assit pitsaassusiat tarrarsuisarnernut nalinginnaasunut sanilliullutik pitsaanginnerupput, qinngornerit sakkukinnerunerat pissutaalluni. Taamaammat inuit assingi soorlu CT-scannerinermisuulli erseqqitsigisumik takuneqarsinnaanaviangillat.

Angalasut aamma scannerneqarnissamik itigartitsinissamut periarfissaqarput, tassungalu taarsiullugu allatut misissorneqarumasinnaallutik.

Aammalu scannerut atugaaleriarpat pasitsaassinerup tunngaveqarluartuunissaa qangatuulli atuutissaaq. Tassa misissuisarnerit maannakkornit amerlanerulernissaat ilimagineqanngilaq.

Siunnersuut innuttaasunut allaaffissornikkut sunniuteqartussatut ilimagineqanngilaq.

## **7. Sunniutissai pingaarutillit allat**

Inatsisissatut siunnersuut allanik sunniuteqartussatut ilimagineqanngilaq.

## **8. Oqartussaasunik kattuffinnillu il.il. tusarniaaneq**

Inatsisissatut siunnersuut piffissami 11. juni 2014-imiit 16. juli 2014-imut ukununga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat (GA), NUSUKA, S.I.K., KNAPK, KPMG Grønland, Deloitte, Grønlands Revisionskontor, Aalisarnermut, Piniarnermut Nunalerinermullu Naalakkersuisoqarfik, Inuussutissarsiornermut, Aatsitassaqarmut Suliffeqarnermullu Naalakkersuisoqarfik aamma Kalaallit Nunaanni Politimestereqarfik.

Aamma inatsisissatut siunnersuut oqaaseqaatitaalu Tusarniaavimmi tamanut saqqummiunneqarput uani [www.naalakkersuisut.gl](http://www.naalakkersuisut.gl).

Tusarniaanermi akissuteqarnissamut piffissaliusseq qaangiummat tusarniaanermi akissutisiffi-gineqarput KANUKOKA, Kalaallit Nunaanni Sulisitsisut Peqatigiiffiat aamma SIK.

Oqaaseqaatit tiguneqartut ataani nalinginnaasumik allanneqarput, Naalakkersuisullu oqaaseqaataat *uingasumik* allanneqarlutik.

KANUKOKA-p kommunit sinnerlugit nalunaarutigaa inatsisissatut siunnersuutip tusarniaas-sutigineqarnera akissuteqarfigineqassanngitsoq, tassami tusarniaaneq taama sivikitsigisumik piffissaqarluni, aammalu tusarniaanermut akissuteqarnissaq julip qaammataanut inissinneqar-simammat tunngavilersorluakkamik akissuteqarfigineqarsinnaanngimmat. KANUKOKA-p kissaatigaa Inatsisartunut ilaasortat ilisimatinneqassasut inatsisissatut siunnersuutip tusarni-aassutigineqarnera kommunit akissuteqarfiginngikkaat, Namminersorlutimmi Oqartussat kommunillu julip qaammataata tusarniaaffiusannginnissaanik isumaqatigiissutaat 20. maj 2010-meersaq eqquutsinneqanngimmat.

SIK-p tusarniaanermut akissummini oqaatigaa tusarniaanermut piffissaliussatut ulluliunneqar-tut immikkoortoq 8-miittut, tassa oqartussaasunik kattuffinnillu tusarniaaneq, eqqortuun-ngitsut.

*Ullut eqqortut immikkoortumut maanna allanneqarput.*

Paasissutissat isumannaatsuunissaat pillugu aalajangersakkanik ilanngussisoqarnissaa Kalaal-lit Nunaanni Sulisitsisut Peqatigiiffiata isumaliutigineqartariaqarsoraa, tassa paasissutissat Akileraartarnermut Aqutsisoqarfiup ilaasunik angallasseqatigiiffiit paasissutissaataasigut elektroniskiusutigut takunnissinnaaneratigut pissarsiarineqartut atornerlunneqaaqqunagit.

*Siunnersuutip imaraa Akileraartarnermut Aqutsisoqarfimmi sulisut aalajangersimasut 'ta-kunnissinnaanissaat', taamaaliorinnaanerlu mittarfimmi toqqaannartumik pisartussaavoq. Tassa imaappoq paasissutissat Akileraartarnermut Aqutsisoqarfiup qarasaasiatigut ator-tuinut toqqorneqarnissaa siunertaanngilaq. Aaqqissuussineq taamaattoq ilaasunik angal-lasseqatigiiffiit paasissutissaataasa suujunnaarsinneqaratarsinnaanerannik, annaan-eqaratarsinnaanerannik ajoquserneqaratarsinnaanerannilluunniit kinguneqarnaviannngilaq, kiisalu paasissutissat susassaqqanngitsunit ilisimaneqalernissaannik atornerlunneqarnissaan-nilluunniit kinguneqarnaviarani.*

*Ilanngullugu oqaatigineqassaaq Akileraartarnermut Aqutsisoqarfimmi sulisut nipangiussillu-innartussaataammata, tassa Kalaallit Nunaanni Pinerluttulerinermik inatsit naapertorlugu akisussaatinneqarsinnaallutik.*

Kalaallit Nunaanni Sulisitsisut Peqatigiiffiat aamma isumaqarpoq, Akileraartarnermut Aqutsisoqarfiup atortut elektroniskiusut atorlugit takunnissinnaaneranut aningaasartuutaajun-



nartut Akileraartarnermut Aqutsisoqarfimmit akilerneqartarnissaat inatsimmi allassimasariaqartoq.

*Aaqqissuussinerup ilaasunik angallasseqatigiiffinnut immikkut ittumik aningaasartuutaanissaa naatsorsuutigineqanngilaq, Akileraartarnermummi Aqutsisoqarfiup atortut pigineqareersut atortussaammagit.*

## Aalajangersakkanut ataasiakkaanut oqaaseqaatit

### § 1-imut

#### *Nr. 1-imut*

Siunnersuutaavoq Akileraartarnermut Aqutsisoqarfik inuttat, ilaasut, usit il.il. pillugit paasisutissanik, ilaasunik angallasseqatigiiffiit billetsinut/inniminniinernut nalunaarsuiffiini toqqaannartumik, mittarfimmi qarasaasiakkut takunnissinnaanissamik piunasaqarnissamut periarfissaqalissasoq. Paasisutissanik pissarsiniarneq nakkutilliinerup ingerlannissaanut pisariqartuussaaq, paasisutissallu atorneqartut suliamut tunngassuteqartuussallutik, tassa imaappoq paasisutissat siunertanut atorneqarfissaminut naammaannartunik imaqaassapput.

Qarasaasiatigut takunnissinnaasut tassatuaassapput Akileraartarnermut Aqutsisoqarfimmi sulisut immikkut toqqagaasut, paasisutissaasivimmut nammineerlutik paasisutissanik aallerinnaasut. Sulisut immikkut toqqagaasut Kalaallit Nunaanni pinerluttulerinermik inatsit naapertorlugu nipangiussilluinnartussaataapput.

Paasisutissat ajornangippat nakkutilliiffiusumi misissorneqartassapput.

Akileraartarnermut Aqutsisoqarfiup ilaasunik angallasseqatigiiffiup elektroniskiusumik nalunaarsuiffiitut toqqaannartumik takunnissinnaanera Akileraartarnermut Aqutsisoqarfiup paasisutissanik allatut tunineqarnissaminik, soorlu ilaasut allattorsimaffiisa mailikkut nassiunneqarnissaannik piunasaqarsinnaaneranut killiliisuunngilaq.

#### *Nr. 2-mut*

Siunnersuutigineqarpoq Akileraartarnermut Aqutsisoqarfiup timmisartut timmisartoqarfimmi tikiffimmi uninngatissinnaassagai, paasisutissat nakkutilliinerup ingerlannissaanut pisariqartut tamarmik tunniunneqarnissaasa tungaanut. Aamma Akileraartarnermut Aqutsisoqarfiup inuit, nakkutilliinerup naammassinissaata tungaanut timmisartumut isernissaat aninissaallu itigartitsissutigisinnaavaa.

#### *Nr. 3-mut*

Siunnersuutigineqarpoq aningaasat tigorianaanaat 15.000 euronik nalillit amerlanerusulluunniit inunnut allanut nassartillugit nassiunneqartut Akileraaruseriffimmut nalunaarutigineqassasut kingusinnerpaamik nassiussat akitsuuseqarfiusumut tikinneranni tassannaanniilluunniit nas-

siunneranni. Aalajangersakkap angalasunut tunngatillugu aalajangersagaq inatsimmi § 30, imm. 4-miittoq assigaa.

*Nr. 4-mut*

Siunnersuutigineqarpoq Akileraartarnermut Aqutsisoqarfiup angalasunik scannerisinnaanera erseqqissarneqassasoq. Inummik scannerineq maanna qinngornerit atorlugit pisinnaavoq, tamannalu inuup timaanik attuugannilluni misissuinermit nalinginnaasumit soqutaannginnerusutut isigineqarpoq.

Aalajangersagaq qinngornerit kisiisa atorlugit inunnik scannerinerinnarmut atuutinngilaq, siunissamili inunnik allatut scannerinermik ineriartortitsisoqassappat aamma atorneqarsinnaalluni.

Inummik scannerissaq siunnersuut naapertorlugu aatsaat pisinnaavoq pineqartoq akuersippat. Akuersinngippat timikkut attuugannilluni misissuisoqassaaq.

*Nr. 5-imut*

Allanguineq aningaasat tigorianaanaat inunntut allanut nassartillugit nassiunneqartut nakkutiliinermi pineqartunut ilaanngunneqarnerannik pissuteqarpoq.

*Nr. 6-imut*

Allanguut inatsimmi § 29, imm. 3-mik nutaamik imm. 7-imillu nutaamik ilanngussisoqarne-rata kinguneraa.

*Nr. 7-imut*

Inatsisit naapertorlugit inuttut isigineqarsinnaasut unioqqutitsineranni Kalaallit Nunaanni Pinerluttulerinermik inatsit naapertorlugu pineqaatissiisinaanerup inatsimmi erseqqissumik periarfissiuunneqarnissaa siunnersuutaavoq.

*§ 2-mut*

Siunnersuutigineqarpoq Inatsisartut inatsisaat 1. juni 2015-imi atuutilissasoq.